



## SAMKEPPNISEFTIRLITIÐ

Lex

b.t. Huldu Árnadóttur hdl.  
Borgartúni 26, 3. hæð  
105 Reykjavík

Reykjavík, 26. júní 2009

Tilv.: 0706011

### **Efni: Meint brot Landssambands veiðifélaga á 12. gr., sbr. 10. gr. samkeppnislaga nr. 44/2005**

Líkt og yður er kunnugt um hefur Samkeppniseftirlitið haft til athugunar tiltekna aðgerðir Landssambands veiðifélaga (hér eftir LV), sbr. andmælaskjal Samkeppniseftirlitsins dags. 13. mars 2008. Í andmælaskjalinu er tekið til athugunar hvort LV hafi brotið gegn 12. gr. samkeppnislaga, sbr. 10. gr. laganna, með því að senda til félagsmanna sína útreiknað meðalverð á veiðileigu og veiddum laxi sem byggt er á upplýsingum sem aflað hefur verið frá tilteknum veiðifélögum. Var það frummat Samkeppniseftirlitsins að með aðgerðum þessum hafi LV farið gegn ákvæðum samkeppnislaga.

Andmælaskjal Samkeppniseftirlitsins var sent yður til umsagnar með bréfi Samkeppniseftirlitsins, dags. 13. mars 2008 og bærust athugasemdir yðar þann 23. apríl s.á. Í bréfinu var frummati Samkeppniseftirlitsins mótmælt og er m.a. á því byggt að upplýsingar um meðalverð á veiddum laxi á liðnum veiðitímabilum séu ekki til þess fallnar að hafa áhrif á verðlagningu veiðileigu til framtíðar litið og að í veitingu umræddra upplýsinga felist ekki ákvörðun, tilmæli, hvatning eða annað um að aðilar samræmdu veiðileigu sína.

Í máli yðar kemur einnig fram að megintilgangur LV með aðgerðum sínum sé að fylgjast með þróun veiðimála. Segir að góð skráning sé mikilvæg til að fylgjast með stofnstærð, veiðiláagi og þeim breytingum sem á stofnum kunna að verða. Þá séu upplýsingar um afla mikilsverðar við vísindalegar rannsóknir og mat á fiskiræktaraðgerðum. Að mati LV séu aðgerðir þessar jafnframt miðaðar að því að afla og geyma upplýsingar sem annars væru ekki tiltækar og sýna fram á efnahagslega þýðingu stangveiði á Íslandi og mikilvægi hennar sem atvinnugreinar.